

Uunga siunnersuut: Sullualuup siunissami aqqusaalutarineqariartuaarnissaa sillimaffigalugu, sapinngisamillu annertunerpaamik periarfissaasinnaasunik atorluanaanissaq siunertaralugu nunatsinni umiarsualivimmik akitsuuserfigineqanngitsumik sanaartortoqarlunilu pilersitsisoqassappat suut pitsaaqutaallutillu ajoqutaasinnaanersut Naalakkersuisut nassuiaasiornissaat pillugu Inatsisartut aalajangiiffissaattut siunnersuut. Nassuiaat UKA 2021-mut naammassineqassaaq.

Inatsisartuni Atassummi ilaasortanit siunnersuutigineqartoq

Pillugu

Sanaartornermut ataatsimiititaliap

ISUMALIUTISSIISSUTAA

Siunnersuutip aappassanneerpeqarnerani tunniunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasoq

Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia

Inatsisartunut ilaasortaq, Erik Jensen Siumut

Inatsisartunut ilaasortaq Nikkulaat Jeremiassen, Siumut

Inatsisartunut ilaasortaq Pele Broberg, Partii Naleraq

UKA2020-mi ulloq 21. oktober 2020 siullermeerinninnerup kingorna siunnersuut ataatsimiititaliamit misissorneqarpoq.

1. Siunnersuutip siunertaa imarisaalu

Kalaallit Nunaanni umiarsualivimmik akitsuuserfiunngitsumik sanaartortoqarlunilu pilersitsisoqassappat suut pitsaaqutaallutillu ajoqutaasinnaanersut kingusinnerpaamik UKA2021-mut Naalakkersuisut nassuiaasiornissaannik peqquneqassasut siunnersuuteqartup kissaatigaa.

2. Siunnersuutip Inatsisartuni siullermeerneqarnera

Siumut, Inuit Ataqatigiit, Partii Naleraq aamma Atassut siunnersuut tapersorsorpaat, umiarsuilli angallattut amerlanerulernerannik pinngortitaq avatangiisillu qanoq sunnerneqarnissaat ernummatigalugu oqaatigaat. Demokraatit aamma Nunatta Qitornai maannakkut taamaattumik nalunaarusiortitsisoqarnissaanut aningaasanik atuisoqarnissaa piffissaasorinagu siunnersuutip itigartinneqarnissaa innersuusutigaat.

3. Siunnersuutip ataatsimiititaliamit suliarineqarnera

Maannakkut niueriaatsit pissutigalugit umiarsualivimmik akitsuuserfiunngitsumik pilersitsinissaq pisariaqartinneqanngitsoq, suliffeqarfiillu akitsuuserfiunngitsumik umiarsualiveqarnermi annertuumik iluaqutissarsinissaat nalorninarloq Naalakkersuisut isumaqartut Ataatsimiititaliamit maluginiarneqarpoq. Naalakkersuisutaaq pissutsinik arlalinnik pitsaanngitsunik taasaqarput umiarsualivik akitsuuserfigineqanngitsumik pilersitsinissamut akerliusunik. Pisariaqartitsivinnerup takkunnissaata tungaanut pilersitsinissamut isumaliuteqarnissaq suliniuteqarnissarlunniit kinguartinneqartariaqartoq Naalakkersuisut tamanna tunngavigalugu isumaqarput.

Illuatungaatigut ataatsimiititaliaq isumaqarpoq, imaassinnaasoq umiarsualivik akitsuusersuiffiunngitsoq piffinni niuertut tikisitsisartut nioqqutissanik akitsuusigassanik, soorlu biilit, nioqqutissat sukkullit, neqit assigisaallu, Danmarkimiit angallanneqartunik utaqqinatik Kalaallit Nunaanni toqqorsivimmiititsisinnaanissaat. Soorlutaaq eqqarsaatigineqarsinnaasoq umiarsuit takornariartaatit nioqqutissanik akitsuuserneqanngitsunik pissarsiniartarnissaannik periarfissiissasoq.

Pissutsit arlallit suli qulaajaaffigineqanngimmata Ataatsimiititaliamit eqqumaffigineqarpoq, umiarsualivik akitsuusersuiffiunngitsumik pilersitsisoqassappat, umiarsualiviliortoqarnissaa pisariaqassava, imaluunniit umiarsualivioereersut killilersorlugit atorneqarsinnaassappat? Umiarsualivik akitsuusersuiffigineqanngitsoq akitsuuserisut suliaannik nammakkersuissava? Ataatsimiititaliap maluginiarpaq, siunnersuuteqartup umiarsualivimmik akitsuusersuiffiunngitsumik pilersitsinissamut tunngassuteqarsinnaasut tamakkua soorlutaaq pitsaaqutaasinnaasunik qulaajaaffigineqarnissaat siunertarerpiarmagu.

Naalakkersuisut maannakkut aningaasaqarnikkut inissisimaneq eqqarsaatigalugu suut iliuusissat aallartinneqarnissaannik pingaarnersiuisariaqarmata Ataatsimiititaliap paasilluarsinnaavaa. Siunnersuut akuersissutigineqarpat, piviusunngortinnera Ineqarnermut Attaveqaqatigiinnermut Naalakkersuisoqarfiup umiarsualiveqarnermut immikkoortuani pilersaarutitik nutarterineranut aallartisarneqareersunut ilaatinneqarnissaa Naalakkersuisut oqaatigaat.

Nalunaarusiassatut siunnersuutigineqartup Kalaallit Nunaanni umiarsualiviit

pilersinneqareersut aallaavigisariaqaraat Ataatsimiititaliaq naliliivoq. Silaannaap allanngoriartornera aamma nunamut periarfissaqartitsinera siumungaaq piareersimaffigisariaqarivut taamaammallu taakkua aamma nalunaarusiami ilanngunneqartariaqarput. Tamatuma saniatigut ataatsimiititaliap paasinninnera malillugu, akitsuuserisut sulinerannut nalunaarusiamut soorlu qanoq akitsuuserneqanngitsunik niuernerup qanoq ingerlasinnaanera pillugu ilanngunneqartariaqartunik siornatigut suliaqartoqareernikuusoq.

Tamanna tunngavigalugu ataatsimiititami allannguutissatut siunnersuut tulliuuttut saqqummiunneqarpoq:

Umiarsualiviit pioreersut atorlugit akitsuuserneqanngitsumik niuerfiusinnaanerannik periarfissanik Naalakkersuisut nalunaarusiornissaat agguassinissaallu pillugu Inatsisartut aalajangiiffigisassaattut siunnersuut.

Inatsisartut aalajangiiffissaattut siunnersuut. Nassuiaat UKA 2021-mut naammassineqassaaq.

4. Siunnersuutip aningaasatigut kingunerisassai

AC fuldmægtigip ukioq ataaseq sulinerata nalinganik nalunaarusiap suliarineqarsinnaanissaa siunnersuuteqartumit naatsorsuutigineqarpoq. Naalakkersuisut umiarsualiveqarnermut immikkoortuani pilersaarutininik nutarterineranut ingerlaavartunut ilanngutissappassuk, ataatsimiititaliamit naatsorsuutigineqarpoq killiliussap iluani kivinneqarsinnaasoq.

5. Ataatsimiititaliap inassuteqaataa

- Ataatsimiititaliap isumatigiittup tulliuuttut allannguutissatut siunnersuut saqqummiuppaa:

Umiarsualiviit pioreersut atorlugit akitsuuserneqanngitsumik niuerfiusinnaanerannik periarfissanik Naalakkersuisut nalunaarusiornissaat agguassinissaallu pillugu Inatsisartut aalajangiiffigisassaattut siunnersuut.

Inatsisartut aalajangiiffissaattut siunnersuut. Nassuiaat UKA 2021-mut naammassineqassaaq.


Taama oqaaseqarluni isumaliutissiissutigineqartumut allassimasunut paasinnilluni ataatsimiititaliap siunnersuut aappassaaniigassanngortippaa.



Justus Hansen
Siulittaasoq




Pva. Aqqaluaq B. Egede
Siulittaasup tullia



Erik Jensen



Pva. Nikkulaat Jeremiassen



Pele Broberg